

**Uunnga siunnersuut: Radiukkut tv-kkullu aallakaatitsisarneq pillugu Inatsisartut Inatsisaata allangortinnissaa pillugu Inatsisartut inatsisissaattut siunnersuut (Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)**

## **Saqqummiussissut**

### **Siullermeerneqarnera**

2014-imi KNR-mi siulersuisut pillugit malittarisassat allangortinnerannut atatillugu Radiukkut tv-kkullu aallakaatitsisarneq pillugu Inatsimmi atuisunut siunnersuisoqatigiit aqputigalugit allaffissornikkut immikkoortumik nutaamik pilersitsisoqarpoq.

Siunnersuisoqatigiit KNR-p siulersuisuinut pitsaassutsimut tunngatillugu suleqatitut atuunnissaat, KNR-milu aallakaatitassiornerit pitsaassutsimikkut pitsaanerulernissaat siunertaasimavoq.

Atuisunulli Siunnersuisoqatigiit siunertarineqartoq malillugu ingerlasinnaasimangillat, tamatumunngalu ilaatigut aqqissuussaannikkut pissusissamisoortoqannginnera aammalu suliffeqarfimmut tunngavissanut KNR-p sulineranut atuuttunut isiginninniarsimanerit pissutaatinneqarput.

Tamannalu nangillugu oqaloqatigiinnerit aamma atuisuniit isummat assigiinngisitaartut piukkunnaatillit aqputigalugit siulersuisut Atuisunullu Siunnersuisoqatigiit akornanni suleqatigiinnerup atulersinnissaa periarfissaasimangilaq. Tassunga ilaavoq ataatsimiittarnerit killeqarsimanerat. Ilanngullugulu Atuisunut Siunnersuisoqatigiit atorunnaartariaqartut, siulersuisullu paarlattuanik assersuutigalugu atuisut oqallittarfiisigut pisariaqartumik paasisaqarsinnaalissasut KNR-mut siulersuisut oqaatigisimavaat.

Tassunga atatillugu Atuisunut Siunnersuisoqatigiit Inatsisartut inatsisaanni KNR-p nammineerluni innuttaasunik soqutigisalinnillu attuumassutilinnik oqaloqateqartarnissap qulakkeernissaanut ersarissumik pisussaaffimmik taarserneqarnissaat siunnersuutigineqarpoq. KNR-ip qaqugukkulluunniit innuttaasunut soqutigisalinnullu attuumassutilinnut paasisaqarnissamut oqaloqateqarnissamullu periarfissaqalernissaata qulakkeernissaa pingaarnertut siunertaavoq, tamakkulu inatsisit naapertorlugit suliffeqarfiup pisussaaffiisa tamakkiisumik naammassiniartarnissaannut pisariaqarput.

Ilanngullugu Radiukkut tv-kkullu pilerisaarisarneq aningaasalersuisarnerlu pillugit Namminersornerullutik Oqartussat nalunaarutaanni nr. 8, 5. juli 2006-imeersumi 2021-mi atorunnaartumi allaffissornikkut aalajangersarneqarluni aalajangersakkamut taarsiullugu tv-kkut upperisarsiornikkut naalakkersuinikkullu isiginneriaatsinut pilerisaarisooqartarnissaanut inerteqquteqartitsinermik siunnersuut imaqarpoq. Tamanna Ombudsmandimit oqaaseqaatigineqartoq nangillugu pisimavoq, tassalu taamanikkut Naalakkersuisuusut 2006-

imi allaffissornikkut aalajangersakkamik atortussangortitsineranni kingornagulluunniit tunngavigineqartumut naammattumik isumannaatsumillu tunngavissaqarsimanngimmata.

Tamat oqartussaaqataanerisigut aalajangeeriaatsip aammalu aningaasarsiornikkut equngasumik ingerlatsisoqannginnissaanut naalackersuinikkut tamallu peqataatillugit oqallinnerit illersortarnissaat aalajangersakkami siunertaavoq. Aalajangersagarlu naalackersuinikkut isummat ilaat soqutigisalinnit aningaasarsiornikkut naalackersuinikkullu inissisimalluartunik annertuumillu pilerisaarinissamut missingersuutilinnit aningaasalersorneqarsinnaanerat tunngavigalugu isigineqassaaq. Tv-kkullu tusagassiorfik taamaasilluni ingerlatsivittut atorpeqalersinnaalissagaluarpoq, tassani aningaasarsiornikkut nukittuunik soqutigisallit aamma nunanit allaneersut ilanngullugit, naalackersuinikkut oqallinnernut akulerussinnaalersillugit. Pilerisaarinermut suliniutit taamaattut tamat oqartussaaqataanerannut ajornartorsiutaalissapput, tassami naalackersuinikkut isummat nukittunerpaat nukissanik amerlanerpaanik tunuliaqutallit maluginiarneqarnissamut eqqaaneqarnissamullu tunngatillugu malunnarnerusumik iluaquserneqarsinnaassammata.

Taamatut oqaaseqarlunga aalajangiiffigisassatut siunnersuut Inatsisartunut oqallisigisassanngorlugu ingerlateqqippara.